

YMA CHANCHINBU KUM 50-NA REPORT:

1. A TOBUL

June ni 15, 1935 khan Young Lushai Association (YLA) din a ni a, YLA din a nih hian chanchinbu tih chhuah a ni nghal mai lova, kum khat hnu June 1936-ah Kristian Tlangau chanchinbuah YLA chanchin bik chhuahna 'YLA Supplement' chu tih chhuah tan a ni a, July leh August awl leh in September 1936 atangin 'Kristian Tlangau' thubelh ah chhuak chho ngar ngar in December 1954 thleng a chhuak ta a ni.

Kum 1955 a lo her chhuah chuan 'Kristian Tlangau' a beh kha a rem ta lova, YMA in chanchinbu kan nei ta rih lo a ni. Kum 1955 'YMA General Conference' chuan YMA chanchinbu chhuah a rel a, a man kum khatah Rs.3 aia sang lo nise, Editorial Board siama lo ngaihtuah zui turin Central Executive Committee (CEC) ruat a ni. CEC chuan Editorial Board te siamin kum 19 chhung mi chanchinbu a bet thin chu a hranpa in YMA chanchinbu kan lo nei ve ta a ni. YMA chanchinbu la tu an tam tawh loh avangin a enkawl a lo harsa a kum 1958-ah chuan tih tawp leh a ni. Kum 1958 YMA General Conference ah chuan YMA chanchinbu chu tih nun leh zai rel a ni a mahse a hlawhchham a, YMA in chanchinbu kan nei leh ta rih lo a ni.

Kum 14 lai YMA chanchinbu a reh vang vang hnu chuan kum 1972-ah Mizo Zirlai Pawl (MZP) chanchinbu September issue-ah YMA chanchinbu hi pheik li awhin 'Suppliment' ah hmun pek ve a ni. Tichuan September, October, November 1972-ah te chuan YMA chanchinbu chu MZP chanchinbuah a bet ta a, December 1972 atang chuan a lang chhunzawm leh ta rih lo a ni

YMA chanchinbu hi tih chhuah ngei duhna a lian hle a, Central Executive Committee (CEC) meeting ni 25, August 1973-a neih chuan hetiang hian a rel ta a ni.

i) YMA chanchinbu chu October 1973 atangin chhuah nise

ii) Khawl - Press a chhut ngei nise

iii) A hmingah YMA chanchinbu tih nise

iv) Pu C. Vulluaia leh Pu H. Zoliana'n bul tum se

v) Thla tin chhuah nise.

Heta an rel ang hian Maranatha press-ah chhu in kum 1973 October thla atangin YMA chanchinbu chu tih chhuah a ni ta a ni. YMA chanchinbu hi pheik 22 in, copy 500 chhuah a ni a, Editor chu Pu C. Vulluaia niin, Pu H. Zoliana chu circulation manager a ni. October 1973 atang hian khawl lam chian loh vang emaw rokhawlhna lian tak a awm a nih loh chuan khaih lak awm lovin tun thlengin tih chhuah a ni ta a ni.

2. Editor lo ni tawh te:

1. Pu C. Vulluaia

4. Pu K. Sapdanga

7. Pu R. Lallianzuala

10. Pu Lalchhanhima Pautu

13. Pu R. Vanlalawmpuia

16. Pu Romawia

2. Pu LT. Zothankhuma

5. Pu C. Lianmawia

8. Pu C. Lalduhawma

11. Pu H. Lalsangzuala

14. Pu Laldawngliana Tochwawng

17. Tv. Lalnunfela Hlondo

3. Pu Thandanga

6. Prof. Laltluangliana Khiangte

9. Pu Lalbiakzuala

12. Pu H. Lalruatlina

15. Prof. Malsawmliana

18. Tv. L. Ramdinliana Renthlei

3. A kawm leh a pheik :

YMA chanchinbu kawm (cover) hi uluk taka duan thin a ni a, kum 2012 atangin a kawm

(cover) chu colour a siam a lo ni a. A cover ah hian CYMA hmalakna thlalak hrang hrang tarlan thin a niin, tun hnai chho ah hian a kawm hmalam a Mizoram chhung Thingtlang lam khaw thlalak dah thin a ni a, a hnung lama CYMA chetvelna thlalak nemkai thin a ni. Tunah hian YMA chanchinbu hi pheik 32 a tih chhuah a ni.

4. YMA chanchinbu man leh Copy zat :

YMA chanchinbu man hi khawvel thang mil zelin tih danglam thin a ni. A hmasa berah chuan Rs.3 a ni a. Rs. 10 te, Rs. 12 te, Rs. 24 te, Rs. 32 te, Rs. 36 te, Rs. 40 te, Rs. 50 te, Rs. 60 te, Rs. 70 te, Rs. 100 te a ni a. Tunah hian kumkhat lak man hi Rs. 120 a ni.

YMA chanchinbu hi 1973 a chhuah a nih tirh khan copy 500 tih chhuah a ni a, a copy pawh hi a pung chho ve tial tial a tunah hian copy 13000 tih chhuah mek a ni.

5. YMA chanchinbu la tam leh Article of the year :

YMA chanchinbu a chhuak Article tha, Article of the year lawmman sem thin a ni a. Tin, YMA chanchinbu la tam lawmman siam thin a ni baw. YMA chanchinbu la tamah hian khawpui chhung branch la tam te, khawpui pawn branch la tam te leh member atanga chhut a la tam hnenah lawmman pek thin an ni.

6. RNI

Kan hruaitu hmasa te hmalakna in kum 2010 January thla atang khan India rama chanchinbu lam thuneitu sang Registrar for News Paper of India (RNI) ah ziah luh a ni a, a number chu MIZ.MIZ/2009/30239 Dt.1.1.2010 a ni.

7. A chhutna (Press):

YMA chanchinbu hi kum 1973-1978 chhung khan Maranatha Press ah chhut thin a ni a, May 1978- June 1981 chhung khan Hnamte Press-ah chhut a ni. Eross Press ah te, Milan Press ah te chhut leh niin, kum 1986 January thla atangin YMA in Press kan lo neih ve takah chuan YMA Press-ah chhut niin tun thlengin YMA Press-ah chhut a ni ta a, a kawm (cover) hi colour a nih avangin Guwahti lama siam tir a ni.

8. Tun dinhmun leh Tlangkawmna :

Tun dinhmunah hian YMA chanchinbu hi CYMA Literature Sub-Committee enkawl na hnuaiah awmin Literature Sub-Committee member atangin editorial board member pawh ruat an ni a. Editor bakah Joint Editor pathum leh News Editor pali in an enkawl mek a ni. CYMA Press Manager Pu B. Lallawmkima chu YMA chanchinbu Circulation Manager atan rin nghal a ni baw. YMA chanchinbuah hian YMA kumpuan pual ziahna tur hmun siam a ni a, mi entawntlak te chanchin ziahna Bihchianna huang siam niin, Article huang te, hruaitute chanchin te, Hriselna huang te, khawvel thlirna te, Branch, Group, Sub-Hqrs leh CYMA chetvelna tarlan thin a ni. Tin, kan **khua** tih huangah a bikin Thing khaw chanchin tawi tarlan thin a niin, Branch YMA chanchin tawi tarlan thin a ni baw a ni.

YMA chanchinchu in hma a sawn ve zel a, a lawmawm hle a ni. Hei aia hmasawn thei a la ni a, YMA chanchinbu in hma a sawn zel theih nan i thawkho zel ang u. 'YMA chanchinbu vul zel rawh se'

Ka lawm e.